

Den Ambiente



JAN POETS

ISELLE DAÑE DEN FUTURO TIN PENZA PA COMPETI PA MISS ARUBA...



**** DEN AMBIENTE** a logra un entrevista cu Iselle "Marguerite" Dañe, kende a representa Sta. Cruz den un forma excepcional durante eleccion di Reina den Aruba Entertainment Center.

Impactante tabata e show di Iselle durante e eleccion, na unda e la trese un dimension nobo di presenta den e publico for di un trapi mei mei entre e publico. No tabatin duda cu PRENSA a vota unanime pa eligi Iselle pa e titulo di "BEST SHOW". Tambe Iselle a lo-

gra e premio como "BEST COSTUME".

Cun un tiki mas suerte, Iselle awe por ta nos di 41 Reina di Carnaval, ya cu E la empata pa e titulo aki hunto cu e representante di Colegio Arubano, Rubinah Bernadina. Pero aki suerte no a toka su persona, ya cu huradonan a eligi Rubinah Bernadina como Reina di Carnaval.

Pa Iselle mes e ta hopi satisfecho pa locual e la logra, y tog ta contento cu ta un representante di Colegio

Arubano a logra e corona, pasobra e tambe ta un alumna di Colegio Arubano.

Iselle a purba su suerte den e eleccion pa Reina di Coastal, pero suerte no tabata na su lado, y E no a logra cay den finalista. Pero e no a "give up", y a bay representa su dushi pueblo di Sta. Cruz.

Iselle ta kere cu e la faya den su speech durante e eleccion di Coastal Queen, pero durante eleccion grandi si e la hasi su maximo esfuerzo pa presenta un speech mas mihor cu ta posibel. Esaki e la logra tambe, pasobra e reaccionan positivo di e publico mes a prueba. Su speech E la dedica na Aruba su Carnaval, cual e la presente den papiamento, ingles y spanjo.

Iselle actualmente tin 17 año y ta bishitando Colegio Arubano HAVO 4 G, y mirando e acohida cu e la logra durante eleccion di Aruba su Reina Carnaval, e tin pensa firme pa bay purba su suerte pa e certamen di MISS ARUBA.

Iselle na final di e entrevista aki, kier a gradici henter e dushi publico muy especial esun di Sta. Cruz pa e tremendo apoyo cu e la ricibi for di nan. Tambe e no por keda sin gradici esnan cu a yuda su persona engrande pa logra e titulonon. Nan ta; Elizabeth Bikker kende a bin cu e idea pa presenta for di e trapi, Thunder & Lighting y Gus Genser, y "last but not least" Carolina Werleman y Grupo Flash pa nan formidabel show riba stage.

DEN AMBIENTE for di awor ta desea Iselle hopi exito pa su participacion den futuro pa e titulo di MISS ARUBA..

PABIEN NA NOS REINA DI CARNAVAL 1995, RUBINAH BERNADINA ...



**** E corona un biaha mas a ser logra pa Colegio Arubano. Riba foto nos por aprecia e Reina saliente Mayren Helmeyer hunto cu su colega Rubinah Bernadina flamante Reina di Aruba Carnaval 1995..**

**** DEN AMBIENTE** ta manda palabranan di PABIEN na nos REINA DI CARNAVAL 1995, Rubinah Bernadina, kende a sa di retene e corona pa Colegio Arubano.

DEN AMBIENTE a trata di logra un entrevista cu nos flamante Reina di Carnaval, pero tempo no a duna ya cu por a compronde cu nos Reina ta hopi ocupa, pa asina e ta bon representa durante e dos paradanan di Carnaval.

Pues Aruba tin su di 41 Reina di Carnaval, kende lo bay habri nos grandioso paradanan tanto diasabra na San Nicolaas y diadomingo na Playa. Ta spera cu henter nos dushi pueblo Carnavalesco lo sa di ricibi nos Reina cu un caluroso bon bini, comina cu fuerte aplausonan..

**DEN AMBIENTE TA DESEA
HENTER PUEBLO CARNAVA-
LESCO UN FELIZ CARNAVAL
SIN ACCIDENTE..**